

ADVENT KALENDER: Bybelverse

DAG 1 - Luk 1:26-28;31

In die sesde maand van Elisabet se swangerskap het God die engel Gabriël gestuur na 'n maagd in Nasaret, 'n dorp in Galilea. Sy was verloof aan Josef, 'n man uit die geslag van Dawid. Die naam van die maagd was Maria. Toe die engel by haar kom, sê hy: "Ek groet jou, begenadigde! Die Here is by jou". Jy sal swanger word en 'n seun in die wêreld bring, en jy moet Hom die naam Jesus gee. Hy sal groot wees en die Seun van die Allerhoogste genoem word.

DAG 2 - Luk 1:38

Maria sê toe: "Ek is tot beskikking van die Here. Laat met my gebeur wat u gesê het". Toe het die engel van haar af weggegaan.

DAG 3 - Matt 1:18

Hier volg nou die geskiedenis van die geboorte van Jesus Christus. Toe sy moeder Maria aan Josef verloof was, nog voordat hulle getroud was, het dit geblyk dat sy swanger is. Die swangerskap het van die Heilige Gees gekom.

DAG 4 - Matt 1:20

Haar verloofde Josef, het hom voorgeneem om die verlowing stilweg te verbreek. Terwyl hy dit in gedagte gehad het, het daar 'n engel van die Here in 'n droom aan hom verskyn en gesê: "Josef seun van Dawid, moenie bang wees om met Maria te trou nie, want wat in haar verwek is, kom van die Heilige Gees.

DAG 5 - Matt 1:21

Sy sal 'n Seun in die wêreld bring, en jy moet Hom Jesus noem, want dit is Hy wat sy volk van hulle sondes sal verlos.

DAG 6 - *Matt 1:22-23*

Dit het alles gebeur sodat die woord wat die Here deur sy profeet gesê het, vervul sou word. “Die maagd sal swanger word en ‘n Seun in die wêreld bring, en hulle sal Hom Immanuel noem” Die naam beteken God by ons.

DAG 7 - *Luk 2:1-4*

In daardie tyd het keiser Augustus ‘n bevel uitgevaardig dat ‘n volkstelling in die hele ryk gehou moet word. Hierdie eerste volkstelling het plaasgevind toe Sirenius goewerneur was in die provinsie Sirië. Almal het gegaan om hulle te laat inskryf, elkeen na sy eie stad toe. Ook Josef het gegaan.

DAG 8 - *Luk 2:5*

Maria, sy verloofde, wat swanger was, het saamgegaan om ingeskryf te word.

DAG 9 - *Luk 2:6*

Terwyl hulle daar was, het die tyd gekom dat haar kind gebore moes word.

DAG 10 - *Luk 2:7*

Sy het haar Eerstelingseun in die wêreld gebring en Hom in doeke toegedraai en in ‘n krip neergelê, omdat daar vir hulle geen plek in die herberg was nie.

DAG 11 - *Jes 9:5*

Vir ons is ‘n Seun gebore, aan ons is ‘n Seun gegee: Hy sal heers, en Hy sal genoem word: Wonderbare Raadsman, Magtige God, Ewige Vader, Vredevors.

DAG 12 - *Jes 9:6*

Sy heerskappy sal uitbrei, en Hy sal vir altyd vrede en voorspoed bring. Hy sal op die troon van Dawid sit en oor sy koninkryk regeer. Hy sal die koninkryk vestig en in stand hou deur reg en geregtigheid, van nou af en vir altyd. Daarvoor sal die onverdeelde trou van die Here die Almagtige sorg.

DAG 13 - *Luk 2:8-11*

Daar was skaapwagters in daardie omgewing wat in die oop veld gebly en in die nag oor hulle skape wag gehou het. Meteens staan daar 'n engel van die Here by hulle, en die glans van die heerlikheid van die Here het rondom hulle geskyn. Hulle het baie groot geskrik. Toe sê die engel vir hulle: Moenie bang wees nie, want kyk, ek bring vir julle 'n goeie tyding van groot blydschap wat vir die hele volk bestem is. Vandag is daar vir julle in die stad van Dawid die Verlosser gebore, Christus die Here!

DAG 14 - *Luk 2:12*

“En dit is vir julle die teken: julle sal 'n kindjie vind wat in doeke toegedraai is en in 'n krip lê”.

DAG 15 - *Luk 2:13-14*

Skielik was daar saam met die engel 'n menigte engele uit die hemel wat God prys en sê: “Ere aan God in die hoogste hemel, en vrede op aarde vir die mense in wie Hy 'n welbehag het!”

DAG 16 - *Luk 2:15-18*

Nadat die engele van hulle afweggegaan het na die hemel toe, sê die skaapwagters vir mekaar: “Kom ons gaan reguit Betlehem toe om te sien wat gebeur het, soos die Here dit aan ons bekend gemaak het”. Hulle gaan toe haastig daarheen en kry vir Maria en Josef, en die Kindjie wat in die krip lê. Toe hulle Hom sien, het hulle vertel wat oor hierdie Kindjie aan hulle gesê is. Almal wat dit gehoor het, was verwonderd oor wat die skaapwagters hulle vertel het.

DAG 17 - Ps 95:6

Kom ons val in eerbetoen voor Hom neer, kom ons buig, kom ons kniel voor die Here ons Skepper!

DAG 18 - Luk 2:19

Maria het alles wat gesê is, onthou en telkens weer by haarself daaroor nagedink.

DAG 19 - Luk 2:20

Die skaapwagters het toe teruggegaan terwyl hulle God loof en prys oor alles wat hulle gehoor en gesien het. Dit was alles net soos dit vir hulle gesê is.

DAG 20 - Matt 2:1

Jesus is in Betlehem in Judea gebore tydens die regering van koning Herodes. Na Jesus se geboorte het daar sterrekykers uit die ooste in Jerusalem aangekom.

DAG 21 - Matt 2:2

Die sterrekykers het gevra: "Waar is Hy wat as koning van die Jode gebore is? Ons het sy ster sien opkom en ons het gekom om aan Hom hulde te bewys.

DAG 22 - Matt 2:9

Nadat hulle die koning aangehoor het, het hulle vertrek; en kyk, die ster wat hulle sien opkom het, het hulle gelei totdat dit gaan staan het bo die plek waar die Kindjie was.

DAG 23 - Matt 2:10

Toe hulle die ster sien, was hulle baie bly.

DAG 24 - *Matt 2:11*

Hulle het in die huis ingegaan en die Kindjie saam met Maria, sy moeder, gesien, en hulle het gekniel en aan Hom hulde bewys. Daarna het hulle hulle reissakke oopgemaak en vir Hom geskenke uitgehaal: goud, wierook en mire.